



Sebastianus ex honesta familia Besserorum Vi
 smæ natus, & in omni genere uirtutū educatus
 est. Is à pueris operam literis dedit, atq; postea rerū
 politicarum administratione clarissimus euasit. nā
 ob raram animi prudētiam in senatum cooptatus,
 singulari dexteritate res sibi commissas expediuit,
 & suam patriā præclaris uirtutibus exornauit. Vn
 de sæpius in Imperij comitijs comparuit, & ut sal
 ua religione pax conseruaretur, suasit. Itaq; ferunt
 illustris. principem Philippum Landgrauium ali
 quoties dixisse, Duos esse in Germania prudentes
 uiros, quibus uel maxima republ. tutō committi
 posset. nimirum hunc Sebastianum Vlmensem, &
 Iacobum Sturmium Argentinensem. Erat is etiam rerum bellicarum haud
 ignarus. Itaq; cum bellum Smalkaldicum ¹⁵⁴⁶ inchoatum esset, Sebastianus
 parti militum præfectus, exercitui fortiter adfuit, atq; suis consilijs nihil inter
 misit, quod ad uictoriam pertinere uideretur. Verū cum principū Saxonix
 discordia copiæ dissoluerentur, atq; fortuna Cæsari arrideret, ita ut nullū aliū
 de præsidium Vlmensibus esset expectandum, ipse suis author fuit, ut cū Cæ
 sare in gratiam redirent, atq; urbem metu obsidionis liberarent. Cum hoc mo
 do Sebastianus pro patria multos labores & pericula subiisset, atque Alberto
 marchioni restitisset, tandem ueneranda canitie conspicuus obiit, atq; filios et
 agnatos patri simillimos reliquit, qui hodie magna dexteritate cum alijs præ
 claris uiris reipublicæ Vlmensi ornamento existunt. Sleid. Anon.